

DEN AMBIENTE

Skirbi pa: Poets



ECLIPSE CONSIDERA "THE BEST IN SOCA MUSIC"

**Nan tabata
tremendo
durante e
contest di
Calypso y
Roadmarch
infantil**

** Sin duda cu ECLIPSE a realiza un trabao estupendo pa nos futuro artistanan. Tremendo mes tabata e acompañamento musical di ECLIPSE, kendenan ta ser considera como "THE BEST IN SOCA MUSIC" aki na Aruba. Riba foto nos por aprecia e dos motornan grandi tras di ECLIPSE, ANTHONY GARIO y MIGHTY RUSTY hunto cu e flamante ganadornan Mighty Saxo Rey juvenil y den infantil Queen Analia..



** DEN AMBIENTE ta desea QUEEN ANALIA hopi forza, y nos ta spera cu nos por tende hopi mas di QUEEN ANALIA despues di carnaval..

E MOTIBO CU E PUBLICO A BOE E HURADONAN..

*Segun nan Soca ta un
cultura di habla ingles..*

** Henter siman DEN AMBIENTE a sinta spera e persona cu mester a bin pa un entrevista, tocante e caso lamentabel cu a pasa durante e Children Roadmarch contest den San Nicolas Sport Park.

DEN AMBIENTE tabata presente, y mester bisa francamente cu no a presencia e presentacion di e parti infantil. Esaki tabata debi na e compromiso di Bingo di tur diadomingo den Tropicana showroom.

Pero asina cu mi a yega mi a puntra un amigo DOUANERO, kendenan lo ta e favoritonan. E persona a contesta cu e tin como favorito Albertico Manuela den infantil. Mesora mi a puntre con Queen Analia su presentacion tabata, y e la bisami cu Queen Analia tabata hopi bon, pero e ta kere cu Albertico Manuela lo bay cu e corona.

Pero tog e la bisa mi cu Queen Analia su articulacion tabata hopi bon mes, y tambe su stage performance a destaca riba tur, y e ta kere cu e titulo lo ta entre nan dos.

Na momento cu e huradonan a eligi e ganadornan, mi tabata prepara mi mes riba stage, pa asina tuma algun fotonan exclusivo cu e ganadornan hunto cu Rusty y Anthony Gario, debi cu nan merece un credito pa nan tremendo trabao y sacrificio.

Na momento cu e publico tabata BOE, mi no por a kere cu tabata Queen Analia nan tabata BOE, pero a kere cu tabata e M.C. Roberto Geerman. Ta despues mi a bin compronde e acto sumamente lamentabel aki.

Tabata na final cu mi a ser aserca pa un persona, kende a bisa mi cu ami ta e unico persona cu por yuda nan, debi cu nan ta sumamente mal contento cu e huradonan. Na e momento cu e tabata splica mi e problema, un miembro di e comision organizador di e contest aki, a bin bisa mi pa corda defende Queen Analia.

Tabata bon cu e la bisami y cana bai, pasobra e persona a rabia masha hopi mes, y kier a actua mesora. Pero mi a uza mi tactica di calma.

Loke e la contami hunto cu e demasnan cu tambe a aserca mi, cu nan no a boe Queen Analia, pero ta e huradonan nan a boe den un forma di protesta. Aki mi a bisanan cu nan a actua sumamente robez, pasobra tin otro forma di protesta manera e mihor forma den medionan di comunicacion, pero loke nan a hasi tabata algo cu ningun hende por despensa nan.

E motibo cu nan a actua asina tabata debi, cu pa nan un soca no por ser canta den idioma papiamento, pasobra esaki pa nan no ta aceptabel. Segun nan, SOCA ta di un cultura ingles, y mester respeta esaki den competencia.

Nan a declara na DEN AMBIENTE cu figura bo cu mayan durante Tumba contest, nan canta tumba na ingles y gana tambe, ta con e publico lo bay reaccionar?

Wel wel ! aki ta caminda nan a pone mi para straight y pensa, y duna nan un rason di calmante, pero tog a keda para riba, cu ni maske cuanto rason nan tin, e hecho aki ta contra tur etica y disciplina, ya cu aki ta trata di un evento di mucha. Tambe no ta importa cu ta e huradonan nan a boe, pasobra simplemente esaki a laga un sabor amargo, cu hamas por ser lubida.

DEN AMBIENTE a invita e persona pa pasa na oficina di DIARIO, pero te cu ayera e no a presenta pa duna su reclamo di disgusto tocante e desicion di e huradonan.

DEN AMBIENTE ta spera cu e hecho lamentabel aki hamas lo ser ripiti. Ta pesey tin corant y radio pa bo por deshoga y solucionaciona locual bo ta kere cu no ta na bo agrado...